



Ministry of Women, Community & Social Development

**LAUGA A LE AFIIOGA I LE PALEMIA MO LE TATALA ALOAI'INA O LE
FA'ATONUFOLAU MO LE TAPU'EINA O LE OLAGA AMATA O FANAU
TAUMEASINA ISLAND RESORT - 11 FEPUARI 2025, 9.00AM**

Susu lau susuga i le Taitai o le sauniga, Susuga Iese Uele

Afifio Minisita o le Kapeneta,

Sui o Pa'aga mai Fafo

Taitai o ekalesia ma afio'aga,

Mamalu o le auvala'aulia,

Talofa Lava.

O lea ua nofo ilo le sā taumua lasi o le Aiga Salevalasi; a ua se'e malū foi le sā o le Tagaloa Safune na momo'o iai Faleata, ina ua tatou soa fa'atasi le papa o le pulu lauie na i le Alataua. Ae ou te le'i suatia la le matā fanua ma ou lalaga le tafu'e o ulufau lē agaiā. Ou te mua'i ta'ia le tāfala o matematega o le faleao o tupu, auā e popo'e tele i lo matou solisoli o malae fa'apea tupua ma la'oai, a'o se'e tauhoa le maualuga o lo outou fitā taupale i lenei taeao.

O le taeao lenei, ua tatou aofaga potopoto e fa'amausalī la tatou maliega autasi, e lagolago le fa'avae mo le ola ma le lumanai o tatou fanau iti. O le tatala aloaiaina o le "Fa'atonufolau mo le Tapu'eina o Olaga Amata o Fanau", o le togo a'e lea o se taeao fou mo Samoa. O se galuega ua fa'atinoina, e fausia ai le fa'avae mausalī o le ono tausaga muamua o le soifuaga o tama ma teine itiiti, ina ia manuia le lumanai mo tagatanu'u, aiga, ekalesia ma le atunu'u. O se tasi o fa'amuamua o le Ta'iala mo le Lumana'i Manuia o Samoa 2021 – 2026, o le atina'eina lea o tomai ma agava'a o tatou tagatanu'u – e aofia ai le fa'aitiitia o le mativa ma le lē tagolima, o le maua o avanoa tutusa mo i latou o lo'o ma'al'ale le soifua lautele, aemaise o le una'ia ina ia mafai ona

maua agava'a e atinae o latou tamali'iaga. O le asō, o le afuaga lea o le fa'afaileleina o le ola manuia o fanau.

O mau fa'asaienisi ma fa'a-le-aganu'u, o le si'osi'omaga e amata ai le ola a'oa'oina o a tatou fanau, o le si'osi'omaga lena e fa'afailele ma tapena ai lona lumanai. E tusa ai ma fa'amaumauga, o le valusefulu pasene o le atina'eina o le mafaufau o se tama poo se teine itiiti, e tupu i totonu o le lima tausaga muamua o lona soifua. O le taimi lea e tatau ai ona atina'e ma fa'afailele le lumana'i o le fanau, ae le i o'o atu i le isi la'asaga tau a'oa'oga. O lona uiga, e le tatau ona tatou fa'atalale i le taimi amata lea o le tapu'eina o le olaga o le fanau.

O le taimi nei, o nisi nei o fa'amaumauga o lo'o feagai ma tatou ma e manaomia ai se galuega fa'aleleia:

- Mai le to'afa o fanau ua atoa le fa tausaga le matutua, e na o le tasi o lo'o resitalaina i aoga amata.
- E to'atele fanau e le o lelei le tausiga i mea'ai paleni, ma e le o maua avanoa e a'oa'oina ai i le amataga o le soifuaga ma mafutaga talafeagai ma mātua.
- Mai le selau lua sefulu ono(126) Aoga Amata resitalaina a Samoa, e na o le tolu A'oga Amata o lo'o fa'amalieina tapula'a ausia mo le aoaoina o le fanau.
- O tupe fa'aalu a le Malo o Samoa o lo'o fa'amauina mo A'oga Amata, e le atoa le tasi pasene.

O le asō, ua tatou molimauina galuega fa'atino e tali atu ai i nei fa'amaumauga o fa'afitauli o le ola amata o tatou fanau iti.

Muamua – o le Fa'atonufofau mo le Tapu'eina o Olaga Amata o Fanau 2024 – 2034. O lenei fa'atonufofau, o se fa'asinoala ina ia mautinoa le maua e fanau o Samoa avanoa tutusa mo le soifua a'oa'oina, o le soifua maloloina, o taumafa paleni, ma le puipuiga talafeagai. O se galuega e fai fa'atasi ma tatou pa'aga, e fa'ailo ai le naunauta'iga a atumotu o le Pasefika ma Malo Afa'atasi aua le fa'ataua o le tapu'eina o olaga amata o fanau.

O le lona lua o fa'alauiloa – o le fa'ailo lea o le Komiti Galulue o lenei Fa'atonufofau. O lenei Komiti e aofia ai sui o Matagaluega a le Malo ma afio'aga

e i ai le tomai fa'apitoa ma agava'a e mata'itu le fa'atinoga o lenei fa'atonufofou ina ia ānoa lona fa'atinoga.

O le fesoasoani i lenei Fa'atonufofou, ua fa'atupeina ai e le Fa'alapotopotoga a le UNICEF le Poloketi mo le atina'e mo le olaga amata o fanau i se tau aofa'i e tolu selau onosefulu afe tala Samoa mo le valu masina. O lenei poloketi o le a fa'atupeina ai tagata e i ai tomai fa'apitoa e galulue ma afio'aga ina ia tu'uina atu le fesoasoani talafeagai mo le tapu'eina o le olaga o fanau.

Ma o le masina o Me i lenei tausaga, o le a talimalo ai le Malo o Samoa i le fonotaga a ta'ita'i o le Pasefika aua le tapu'eina o le olaga amata o fanau. O lenei fonotaga o loo avea ai le tatou Malo ma Sui Ta'ita'ifono o lenei Komiti fa'apitoa a le Pasefika.

O nisi ia o taumafaiga a Samoa aua le tapu'eina o le olaga amata o fanau, ma o nei galuega o loo lagolago malosi iai le Fa'alapotopotoga a Malo Afa'atasi aua fanau poo le UNICEF, ma e tauala mai i le Matagaluega o Tina, Atina'e o Nu'u ma Afio'aga ma le Lala Ma'oti mo Afio'aga. E fa'aleoina ai ma le loto fa'afetai le fa'alapotopotoga o le UNICEF mo le lagolagosua i lenei galuega fai fa'atasi, ma le Matagaluega o Tina ma Tamaitai, Atinae o Afioaga ma Agafeso'otai.

E avea ai foi lenei laolao, e fa'aleo ai le agaga fa'afetai i Matagaluega a le Malo o Samoa, o Fa'alapotopotoga tuma'oti, o Ekalesia, o pa'aga mai Fafo aemaise le saofaiga a matai mo lenei galuega mae'ae'a aua le manulauti – o le 'Galulue Fa'atasi' mo le tapu'eina o le olaga amata o fanau.'

E mana'omia le tatou galulue fa'atasi. E le gata o Matagaluega a le Malo e aofia ai a'oa'oga, o le soifua maloloina, o afio'aga aemaise o tupe, o fa'alapotopotoga tuma'oti, o Ekalesia ma afio'aga fa'apea a tatou Pa'aga mai fafo.

Ma o se lu'itau fo'i lea mo i tatou uma:

- Mo matua ma e o loo tausia fanau – o le lumanai o lou alo e amata mai i le aiga. Talanoa ma fa'asoa, ma fa'afailele lona lumanai manuia.
- Mo saofaiga a ali'i ma faipule – ia tautuana ma fa'amuumua le ola amata o tatou fanau.
- Mo faiaoga ma auaunaga fa'a-soifua maloloina – ia atoatoa le auaunaga amata mo fanau.

- Mo tatou pa'aga mai fafo – Ia tatou galulue fa'atasi ina ia maua alagaoa e fa'atino ai lo tatou moemitiga.

O le afuaga o se lumanai manuia ma se atunu'u saogalemu, o le taimi lenei e fa'atino ai. O le atinaeina o fanau, o le galuega fai fa'atasi a tatou uma.

O le ave o le tatou fa'amuamua i so'o se vaega e atinae ai le olaga amata o fanau, o le manuia lena mo aso a sau, e le gata e soifua maloloina, aoaoina lelei ma se Samoa fa'atamaoaigaina.

Ma ou te fiafia lava e fa'apea atu, ua tatala aloa'ia nei le Fa'atonufofau ma lana Komiti Galulue mo le Tapueina o le Olaga Amata o le Fanau, mo lona fa'aaogaina.

Soifua ma ia manuia.